



Penuntut-penuntut Kolej Islam sedang belajar

KOLEJ ISLAM MALAYA SELAMAT DIBUKA

Dalam suatu sambutan yang bersejarah, Kolej Islam Malaya telah selamat dibuka di Klang pada hari Jumaat 1 Sha‘bān (8 April) yang lalu dengan dihadiri oleh raja-raja Melayu, Tuan Pesuruhjaya Tinggi Tanah Melayu, alim-ulama dan orang-orang yang kenamaan berjumlah kira-kira dua ribu orang lelaki dan perempuan.

Cita-cita hendak mewujudkan pelajaran tinggi yang memenuhi maksud dan tujuan Islam yang sebenar-benarnya inilah yang telah menggerakkan umat Islam di Malaya ini mendirikan Kolej Islam ini-demikian madhmun ucapan D.Y.M.M Sultan Selangor dalam pembukaan rasmi Kolej Islam.

Tuan Sayyid Ibrāhīm al-Saqāf Pengerusi Jawatankuasa Pusat Penaja Kolej Islam dalam ucapannya berkata:

“Kehendak kepada mewujudkan Kolej Islam ialah suatu kehendak dan hajat yang meliputi seluruh umat Melayu dan Islam untuk menyempurnakan tuntutan-tuntutan kebangsaan dan pentadbiran, keagamaan dan kebudayaan, bahkan bukan itu sahaja tetapi adanya kolej ini adalah juga menyelamatkan beberapa banyak wang yang tidak dapat tidak tentu dibelanjakan di luar negeri apabila penuntut-penuntut kita pergi belajar agama ke negeri-negeri Islam yang lain.....”

Setelah mengucapkan terima kasihnya kepada demawan-demawan yang telah menyokong dan menjayakan terdirinya Kolej Islam, Tuan Sayyid Ibrāhīm berkata: Sayogia dikenang nama Sāhib al-Faḍīlah al-Marhum Mawlanā ‘Abdul ‘Alī al-Şiddīqī yang sangat-sangat menggalakkan supaya terdirinya Kolej Islam ini.

Pusat Kebudayaan Islam

Al-Faḍīl Tuan Isma‘īl ‘Umar ‘Abdul Azīz, mudir Kolej Islam Malaya, bagi pihak profesor-profesor dan penuntut-penuntut kolej, berkata dalam ucapannya pada hari bersejarah itu:

“Bagi mendapatkan tujuan yang termaktub dalam perlembagaan Kolej Islam maka susunan pelajaran kolej ini diatur dan dilanjutkan dalam satu masa yang sederhana, penuntut-penuntut akan diajarkan ilmu pengetahuan yang sesuai dan padan dengan darjat taraf kolej dan bersaing dengan hajat dan tuntutan kemajuan masyarakat hidup dalam tanah Melayu.

“Pelajaran agama dan persuratan arab suatu perkara yang diutamakan dalam kolej ini dengan tidak pula melupakan persuratan Melayu dan Inggeris. Pelajaran yang berhubung dengan masyarakat dan pergaulan diajarkan dengan kadar yang berpatutan supaya penuntut-penuntut dapat hidup bersaing dengan penuntut-penuntut sekolah lain dan dapat mensuaikan diri dengan orang ramai sama ada di kampung atau di bandar”.

Cawangan Latihan Guru

Lebih lanjut beliau menerangkan: “Belum ada sekolah-sekolah yang tertentu bagi melatih guru-guru mengajar di sekolah Arab dan sekolah agama hingga sekarang, maka kolej ini bercadang mengadakan suatu cawangan khas bagi melatih guru-guru mengajar di sekolah Arab dan agama menurut peraturan-peraturan cara baharu.

Kadi dan Peguam Syarie

“Pekerjaan kadi dan peguam syarie – katanya lagi suatu perkara yang mustahak menurut peredaran kemajuan tanah Melayu sekarang, maka melatih kadi-kadi dan peguam syarie dengan pengetahuan dan dengan cara peraturan yang sesuai sangat dikehendaki, maka kolej ini akan

mencadangkan suatu cawangan melatih jawatan kadi dan peguam syarie.

Karang-mengarang Dalam Pengetahuan Islam

Seterusnya al-Faḍīl Tuan Mudir Kolej Islam berkata: “Dalam latihan menulis mengarang rencana, buku-buku dan kitab dalam lapangan persuratan agama, kolej ini akan mengaturnya dengan cara yang tertentu bagi menolong memaju dan meluaskan medan karang mengarang dalam pengetahuan Islam. latihan tabligh dan mengajak dan menyeru kepada Islam adalah dilatih dengan cara teratur dengan kursusnya (pelajaran) yang khas bagi mengarahkan perasaan agama di antara orang Islam”.

Sayogia disebut pensyarah-pensyarah dan guru-guru Kolej Islam pada masa ini terdiri daripada dua orang profesor dari mesir (lepasan Azhar dan *London University*) iaitu al-Ustādh Doktor Muḥammad ‘Abdul Ra‘ūf dan Doktor Abū al-Khayr Zakī, al-Ustādh Isma‘īl ‘Abdul Azīz Jawhar (lepasan Azhar dan Universiti Kaherah) menjadi mudir, A. ‘Abdul Raḥīm Ibrāhīm Singapura guru bahasa Melayu dan Inggeris, dan Tuan Dhūlkifli Muḥammad (lepasan Azhar dan *American University*) Mesir menjadi setiausaha kolej.

Pesan dari sekarang

sedang disiapkan

‘Umar Bin al-Khaṭṭāb

(penggal ketiga)

oleh

‘Abdullāh Basmeh

Belanja pos 10 sen

naskhah \$ 1.20

Qalam, 356-8, Geylang Rd., Singapore 14.
